

**Illunut sanaqataaffiusunut taarsigassarsiat pillugit Inatsisartut inatsisaat nr. xx, xx. xxx  
2018-imeersoq**

(Ineqarnermut Attaveqaqatigiinnermullu Naalakkersuisoq)

**Akissuteqaat**

(Ineqarnermut Attaveqaqatigiinnermullu Naalakkersuisoq)

**Aappassaanneerneqarnera**

Inatsisartut Sanaartornermut Ataatsimiitaliaat inatsisisattut siunnersummut isumaliutissiissuteqrpoq. Naalakkersuisuniit Inatsisartut Sanaartornermut Ataatsimiitaliaat inatsisisattut siunnersummik suliaqarnerannut qutsavigaarpuit.

Naalakkersuisut naammagisimaarlugu maluginiarpaat, Sanaartornermut Ataatsimiitaliamit ilaatigut piginneqatigiilluni inissiat pillugit inatsimmi aamma inissianik aningaasalersuisarneq pillugu inatsimmi periarfissanik atuinikkut inissianik imminut pilersornissamut periarfissat assigiinngitsut ilisimaneqartut.

Sanaartornermut Ataatsimiitaliap aappassaanneerinermut isumaliutissiissutaa tunngavigalugu Naalakkersuisut aappassaanneerinissamut allangguutissatut siunnersummik saqqummiussaqarput, aammalu imaattunik oqaaseqaateqarlutik:

Siunissami illunik sanaqataaffiusunik naammassineqanngitsunik uninngaannartoqartannginnissaanut qulakkeerisoqarnissaa Sanaartornermut Ataatsimiitaliamit kissaatigineqarpoq. Tassunga tunngatillugu Naalakkersuisut ilisimatitsissutigisinnaavaat, inatsimmi atuuttumi allassimasut akerlianik siunnersummi § 15, imm. 3-mi allassimammat, kommunalbestyrelsi atortunut kiisalu illunik sanaqataaffiusunik sananeqartunut piginnittuusinnaatitaasoq. Taamaalluni inatsisit tunngavigalugit kommunalbestyrelsi sanaqateqarluni illuliap naammassinissaata tungaanut atortunut piginnittuusussaavoq, taamaattumillu sanaartukkap naammassinissaata imaluunniit sanaqateqarluni illuliortumut nutaamut tunniunneqarnissaata qulakkeernissaa pisussaaffigalugu. Tassalu kommunalbestyrelsip siunnersummi § 7, imm. 2 tunngavigalugu sanaqateqarluni illuliamik naammassineqanngitsumik sanaqateqarluni illuliortumut nutaamut tunniussinissaq periarfissaqarfingereerpaa. Taamaattumik Naalakkersuisut isumaqarput, siunnersummi kommunalbestyrelsi illup sananeqartup naammassineqarnissaanik piffissarlu eqorlugu sananeqarnissaanik qulakkeerinissamut ersarissumik kaammattorneqareersoq.

Siusinnerusukkut sanaqateqarluni illuliortussat ilaat suli nunaminertamik atugassiinissaq inissinngitsoq illuliassanik tunineqartarsimasut Naalakkersuisut eqqumafifigat. Ajoraluartumik pisuni ataasiakkaani sanaartornermi atortussat atorneqarsinnaanatik sivisuumik uninngasariaqarsimamanerink tamanna nassataqarsimavoq. Tamanna isumalluutinik

naapertuuttumik atuinerunngilaq. Naalakkersuisut kommuninut erseqqissaatigaat, kommunit siunissami illuliassanik tunineqaraangata, soorunami illuliassamut nunaminertamik atugassiisimanissaq naatsorsuutigineqartussaammat. Taamaalilluni aamma sanaqateqarluni illuliortnermut inatsimmi erseqqissaatigineqarpoq, suliами pisortani oqartussaasoq ataasiinnaq akuusussaammat – tassalu kommuni. Tamanna Naalakkersuisut aqtsinermik pisariillaallutik sulinerannut assersuutissaavoq – marloqiusamik aqtsineq qimanneqassaaq aammalu innuttaasut qaninnerullugit ingerlatsisoqassalluni.

Atortut katiteriaannaat sanaartornermilu atortut toqqissimanartumik uninngatinneqarnissaannik qulakkeerisoqarnissa Sanaartornermut Ataatsimiititaliap kissaatigaa, tamannalu tunngavigalugu sanaartornermut atortussat containerinut poorlugit tunniunneqarsinnaanissaannut periarfissat misissorneqassasut siunnersuutigaa.

Sanaartugassat katiteriaannaat 35,5 tonsit missaannik oqimaassuseqarput. Nassiunneqarnerminni 100 kubikmeterinik annertussuseqarput. Taakku containerinut mikisunut, 6 kubikmeter-inik annertussuseqartunut (annerpaamik 3 tonsinik oqimaassuseqartunut) poortorneqarunik, sanaqateqarluni illuliassamut ataatsimut nassiuressinermi containerit 35-t missaanniittut atorneqassapput. Taakku saniatigut atortut, soorlu 'nassiuressat ulorianartut' aamma 'isugutammut illersugassat' nassiuressat immikkut ittutut assartorneqartussaapput.

Nunaqarfinni isorliunerusunilu 1,5 tonsit sinnerlugit oqimaassusilinnik kivitsinissamut usilersuinissamullu piginnaanilinnik peqartoqanngilaq. Umiarsuarmiit umiarsualivimmuit aamma umiarsualivimmuit sanaartorfimmuit tamanna pisinnaanngilaq. Assartugassat taamaattut nunaqarfinni isorliunerusunilu unamminartoqartinneqarnerat peqqutigalugu sanaartornermi atortussat Danmarkimiit umiarsualivimmuit siaruarteriffiusussamut qaninnermut, soorlu Aasiannut containerinut matoqqasunut ammasunullu ataasiakkaanngorlugit poortorlugit assartorneqartarput. Tassani nassiuressat ammarlugit ataasiakkaanut, annerpaamik 1,5 tonsinik oqimaassusilinnut immikkoortiterneqartarput, aammalu umiarsuit nunaqarfiliartaatit aqqutigalugit ataasiakkaatut ingerlateqqinnejqartarlutik. Sanaartornermi atortussat siunnersuutigineqartutut containerinut poorlugit assartorneqarsinnaangitsut Naalakkersuisut isumaqarput. Naalakkersuisut isumaqarput, sanaartornermi atortussat sapinngisamik pitsasumik isumannaatsumillu isumagineqartariaqartut, kisiannili soorunami periarfissaqalerpat pitsannguutaasinnaasunik suliniuteqarnissaq qulakkeerniarlugu suliassaqarfik malinnaaffigissallugu.

Matumani aamma uteqqissavara, illuliassat tunniunneqannginnerini nunaminertamik atugassiinissamik qulakkeerisarneq illuliornermi atortussat sivisunerusumik uninnganissaannik pinngitsoortitseqataasussaammat. Iliusissat pisariunngitsut, soorlu ulersualiisarneq sanaartornermi atortussanik piffissami sivikitsumi illersuutitut atorneqarsinnaapput.

Illorput 2100-p nutaap pilersaarusrusiornerani misilittagaa simasut pissarsiarineqartut eqqarsaatigineqarsimapput, tassungalu illup sukkasumik matuneqarnissaata aallunneqarnissa ilaatinneqarpoq. Suleriaatsimik illup ullaat 14-it ingerlanerini matuneqarsinnaanissaanik qulakkeeriffiusumik ineriatortitsisoqarsimavoq. Taamaalilluni atortut isugutsiasut naqqup ataanut pukkitsumut illumulluunniit ilillugit anorimut, sialummut apummullu illersorneqarnissaat qulakkeerneqarpoq.

Siunnersuummi § 13-imni Naalakkersuisut siunnersuutigaat, inunnut ukiuni kingullerni tallimani sulisimannngitsunut taarsigassarsitsitsisoqarsinnaassanngitsoq, taakkununngalu ilinniartut ilaatinneqarput. Sanaartornermut Ataatsimiititaliap isumaliutissiisummini oqaatigaa, ilinniartut ilinniarnersiutisiallit inunnut pisortanit ikorsiissutinik pisartagalinnut sanilliunneqartariaqanngitsut. Naalakkersuisut Sanaartornermut Ataatsimiititaliap isummersuutai tusaatissatut tiguaat, aammalu allannguutissatut siunnersuummik saqqummiussaqarlutik.

Illut atasinnaassusianni tamarmiusumi aningaasartuutit appasitsinneqarnissaasa aammalu atortunik aserfallatsaaliorneqartariaqanngitsunik atuisoqarnissaata pilersaarusrusiornermut ilaatinneqarnissaannut qulakkeerisoqarnissa Ataatsimiititaliap kissaatigaa. Naalakkersuisut ilisimatitsissutigisinnavaat, siunnersuummi § 35, imm. 1-imut nassuaatini allassimammat, Naalakkersuisut illup suussusaanik akuersinerannut atatillugu atortunik aserfallatsaalioriaqanngitsunik, imaluunniit atortunik ingerlaavartumik aserfallatsaalieuinermi piumasaqaatinik annikillitsiviusunik sapinngisamik annertunerpaamik atuinissaq annertuumik pingaartinneqartussaasoq. Tassalu Naalakkersuisut periarfissaq taanna isumaliutigereerpaat, aammalu illumik sanaqataaffiusumik piginnittup illumik aserfallatsaalieuinerata ajornaatsuunissa kissaatigalugu.

Sanasunik amigaateqartoqarsinnaammat Sanaartornermut Ataatsimiititaliap piffissap sanaffiusussap sivikkippalaarnissaanik ernumassuteqarnera eqqarsaatigalugu Naalakkersuisut ilisimatitsisinnaapput, siunnersuummi § 15, imm. 2-mi piffissap sanaffiusussap ukiunik marlunnik sivisussuseqarnissaanik piumasaqaammut tunngatillugu immikkut ittumik akuerineqarnissamik qinnuteqarnissaq periarfissaareermat. Immikkut ittumik akuerineqarnissamik qinnuteqaatini tamani kommunalbestyrelsi suliani aalajangersimasuni naliliisassaaq.

Illunik sanaqataaffiunik nunaqarfinni illoqarfinnilu minnerni tamani sanasoqarsinnaassasoq Sanaartornermut Ataatsimiititaliamit kissaatigineqarpoq. Tamanna allannguutissatut siunnersuummut ilanngunneqarpoq.

Illut sanaqataaffiusut utertinneqartut inissiap teknikkimut aningaasaqarnermullu nalinganut naleqqiullugu akikippalaamik kommunimiit tunineqartarnissaat Sanaartornermut Ataatsimiititaliap ernumanartoqartippaa.

Kommunip illup sanaqataaffiusup utertitap tuninissaa kissaatigippagu, illup qaffasinnerpaamik akilersillugu tunineqarnissaa communalbestyrelsip soqtisarisussaavaa. Kommunit aningaasaqarnikkut akisussaassusilimmik sanaartortassasut Naalakkersuisunit tatigineqarpoq. Kommunalbestyrelsip tuniniaanermini aningaasat kissaatigineqartut piissarsiarisinnaanngikkunigit, communalbestyrelsip inissiaq kommunip inissiaataattut attartortittakkatut atorsinnaavaa.

Taamatut oqaaseqaateqarlunga Naalakkersuisut sinnerlugit immikkoortoq Inatsisartuni kajumittumik suliassanngorlugu tunniuppara.